

Dominasi kuih raya moden pudarkan kuih tradisi?

DAHULU kuih raya tradisional seperti batang buruk, semperit dan makmur menjadi kebanggaan setiap rumah.

Kini, kehadiran kuih tart berkeju dan biskut inspirasi Timur Tengah pula semakin mendominasi meja Aidilfitri.

Perubahan ini bukan sekadar trend, tetapi mencerminkan bagaimana globalisasi dan perubahan gaya hidup telah mengubah selera masyarakat.

Pensyarah Jabatan Pengurusan dan Khidmat Makanan, Fakulti Sains dan Teknologi Makanan (FSTM), Universiti Putra Malaysia (UPM), Dr. Muhammad Rezza Zainal Abidin berkata, kuih moden seperti Tart Cadbury dan Cornflakes Madu semakin mendapat tempat, manakala kuih tradisional seperti biskut dam dan agar-agar kering pula kian dilupakan.

Walaupun inovasi ini mencerminkan kreativiti dalam dunia kulinari, namun mengancam warisan makanan tradisional jika tiada usaha pemeliharaan dilakukan.

Begitupun, perubahan trend kuih raya moden tidak dapat dielakkan akibat pengaruh globalisasi, media sosial dan faktor ekonomi.

“Bahan premium seperti keju dan coklat kini lebih mudah didapati, sementara gaya hidup moden mendorong permintaan kuih yang cepat disediakan dan menarik perhatian.

“Kuih tradisional yang memerlukan masa dan ketelitian semakin kurang digemari generasi muda yang lebih memilih sesuatu yang unik dan *Instagram-worthy*,” katanya.

Kuih moden yang lebih menarik daripada segi visual dan rasa memberi kelebihan daripada sudut pemasaran.

Namun, tanpa usaha memartabatkan kuih tradisional, generasi akan datang mungkin tidak lagi mengenali kuih seperti biskut dam atau agar-agar kering.

Beliau turut menekankan kepentingan mendokumentasikan resipi dan teknik pembuatan kuih tradisional agar warisan kulinari ini tidak lenyap.

Jika inovasi dilakukan tanpa asas tradisional, kuih raya hanya akan menjadi produk komersial tanpa nilai sejarah.

Oleh itu, usaha berterusan perlu dilakukan bagi mengekalkan identiti kuih raya dalam dunia moden.

Bagi memastikan kuih tradisional kekal relevan, perlu ada pendekatan yang lebih dekat dengan gaya hidup generasi muda.

“Kita boleh mengadakan bengkel interaktif, menghasilkan kandungan media sosial yang memaparkan sejarah kuih tradisional serta menampilkan elemen baharu tanpa mengubah keasliannya,” katanya.



AGAR-AGAR kering antara kuih raya tradisi yang perlu dikekalkan.
- GAMBAR HIASAN